

■ PRO RAETIA

Andreas von Sprecher fa bilantscha

(anr) En las «Communicaziuns» da la Pro Raetia – integradas en la Terra Grischuna – tira Andreas von Sprecher, stà 13 onns parsura, en in discurs ina bilantscha averta – tant positiv sco negativ.

Il parsura demissiu-nant suttastritga en ses pled da cumià – tegnì a chaschun da la dieta champestra da la Pro Raetia l’atun passà a Puschlav – la gronda muntada da quel inscunter ed è engraziaivel ch’in tal ha lieu onn per onn en noss chantun. Quel saja positiv per la Pro Raetia. Igl existia numnadamain il privel ch’il chantun sa dividia internamain ed emblidia quant ch’el haja d’engraziar a las colliaziuns strada-

las, a l’economia, al turissem e surtut als giasts da l’exteriur ed als gronds amatur-s. Qua sa mussia igl adina puspè quant impurtant ch’il contact persunal saja. En quest regard pudessian ins anc far bler dapli.

Sco in factur fitg negativ ha il parsura partent taxà la digren cuntinuanta da commembers en las uniuns grischunas da la Bassa sco era tar organisaziuns tegralas da la Pro Raetia. Blers giuvens e giuvnas na sa lian betg pli cun las estructuras tradiziunalas d’uniuns. Ed el sa dumonda schebain ins duessia far adiever dals novs meds socials cun tschertgar e realisar autras estructuras.

Donn saja igl era che vischnancas grischunas na sajan betg avunda conscien-tas da lur schanzas cun quellas personas che hajan stuì bandunar il chantun ord raschuns economicas, mo che abiteschian adina puspè in zic qua, e schi saja er mo en patratgs. Nus hajan dad ina vart tema da midadas, mo hajan alur era la grondezza da las acceptar ed ir enturn cun ellas.

La Pro Raetia possia surpigliar la funcziun d’ina uniun cun dar impuls, siond ch’ella colligia personas che han tuttas insatge cuminaivel – numnadamain: lur gronda simpatia per il Grischun.